

Estudio a wordo haci riba importancia cultura pa turismo

Gran apertura di e prome museo na San Nicolas, e Museo Industrial



DIALUNA anochi a tuma lugar apertura di “Museum of Industry” na San Nicolas (Watertoren).

Un satisfaccion sumamente grandi pa mira un vision y mision cu a nace na momento cu a dicidi pa cuminsa cu un restauracion na 2009/2010.

Segun Minister Otmar Oduber 4 aña pasa a pone e base y plataforma tur rond di Aruba. Aña 2012/2013 a tuma e decision a base di estudionan cu a wordo haci, di e importancia cu cultura tin pa bo turismo. Mi a bise hopi biaha, cu hopi aña cultura a yora pa atencion. Awor nos ta yora cultura pa atencion pa sostene e pilar economico di pais Aruba y nos turismo”.

E apertura di e prome museo na San Nicolas, e Museo Industrial cu naturalmente lo sigui dentro di poco cu e di dos museo cual ta Nicolas Store. Esaki lo t’e cas p’e di dos museo aki na San Nicolas.

“Ta yena nos cu orguyo cu ora cu a dicidi cu kier haci San Nicolas e prueba cu por haci un ciudad industrial unda cu poco

hende ta kere cu bo por haci desaroyo economico di dje.

Awor ta bay musta cu por crea un industria cultural unda cu e cultura y herencia lo wordo transmiti pa nos propio hendenan pa nos recorda di unda nos ta bin, pero tambe p’e impacto den e economia di pais Aruba y area di San Nicolas.

Un Cultural Heritage City, un atraccion nobo pa pais Aruba.

“Awenochi mi kier recorda trabounan grandi cu partnernan cu a sinta hunto cu ne y a musta e direccion cu kier bay, preparando pa loke San Nicolas mester bira.” E mandatario a gradici tur colega y Prome Minister Mike Eman p’e vision.

“Monumentenfonds, Monumentenbureau y partners manera ATA, TPF y diferente NV, Elmar, WEB y Setar y sin laga afo APA cu cierto momento a bisa di lo sostene e museonan aki. Inversion cu a wordo haci ta uno pa tin nada mas cu e mihor aki na San Nicolas”, Minister Otmar Oduber a termina.